

郁文道兄正之
荆鴻

獨漉堂詩箋

上冊

獨漈詩箋

荆鴻



承印者：中華書局香港印刷廠

獨漉堂詩箋目次

楊序

自序

又序

凡例

陳獨漉先生象

陳荆鴻謁墓詩

陳獨漉先生聽劍圖

陳獨漉先生自題聽劍圖贊

陳獨漉先生行狀（梁佩蘭撰）

陳獨漉先生傳（馮奉初撰）

獨漉堂集序一（彭士望撰）

獨漉堂集序二（趙執信撰）

陳獨漉先生原序

初游集（三十三首）

增江前集（一十七首）

中游集（五十四首）

增江後集（一百八十三首）

江村集（九十七首）

小禺集（一百七十首）

小禺後集（四十八首）

唱和集（三百一十二首）

序

詩三百篇大抵詩人有爲而作孔子刪之存之使後世得覘其治亂美惡也夫詩人曷爲而作凱風曰七子怨母也曷爲而作黃鳥曰哀三良也曷爲而賦碩人曰美莊姜也則後儒箋釋之文也有此箋文而後諷刺美頌各得其故而詩人之意乃愈明唐以來詩人莫如少陵其諸名篇莫不與史相發明故誦杜詩者同時心目間有唐書在而後知其契稷之抱忠愛之誼與誦飛卿長吉之風雲花鳥者蓋有異矣雖初學亦能諷杜詩而背誦開天遺事則箋注之功大矣夫注注其音義故實箋箋其本事本旨以考合其時其境也注杜詩者夥矣箋杜詩者以牧翁爲著然往往以己意武斷不免穿鑿之誚則箋之業亦難矣清初天南詩人陳獨漉與屈翁山齊名余三十年前嘗讀其詩數十篇知其美而不知其所以美也數年前余識順德陳君荆鴻

於津門今歲避地香江荆鴻亦以避兵先至流寓相逢欣慰倍
昔暇出手著獨漉詩箋見示披誦數日乃知獨漉之懷抱身世
家痛國變與乎崎嶇閩楚之際徬徨黃河太行之間孤危飄泊
志蓋有爲言則有物而後知其詩之所以美也蓋其心存朱明
意圖恢復實亭林一流人物迨鄭成功張煌言兵敗出海知大
勢無可復爲於是行吟孤憤以詩人終其身觀其增江集吹臺
歸舟感懷別翁山諸詩忠愛悱惻拳拳故國較之同時梅村且
或有過顧世無箋本不明其所爲人亦不能以知梅村者知獨
漉則獨漉詩之不幸也荆鴻與獨漉同里同宗族其尊人緯南
先生爲績學之士荆鴻秉承家訓早以能詩蜚聲海內茲本悉
據明清兩朝史傳紀載省縣志書遺逸詩文著述各家家乘年
譜詳徵博采緣詩考事不以事飾詩精當翔實開卷了然吾知
有此箋本獨漉之詩將更大行於世而三百年來潛德幽光之

若明若晦者將由是而其道大光若少陵梅村之家弦戶誦焉
則荆鴻窮年兀兀之功也嗟夫獨漉雖遭鼎革之痛然順康之
際明良在上景運隆盛一姓雖易而萬姓皆安故抱道守貞之
士猶得一邱一壑孤吟獨嘯含和保粹而優游其歲月使獨漉
生於今世所聞者炸彈巨礮山崩城圯之聲所見者斷脰折臂
流民餓殍之慘流血暴骨無間南北窮鄉僻壤無逃蹂躪狷介
之士欲行吟澤畔自守幽貞以致其宗國之思而不可欲輕天
地細萬物與世無爭苟全性命而不可卽欲棄世離垢與木石
居與麋鹿游託之無何有之鄉而亦不可以視獨漉以詩文照
耀百世復有賢君子爲之箋釋使其懷抱旨趣得訴之來者今
世詩人如獨漉者亦大有其人矣然生當天人道窮文質毀滅
之秋其憤慨憂鬱所謂發爲文章藏之名山者託之遙遙不知
何代之人是足悲矣獨漉雖不幸而大幸哉至獨漉詩氣體風

骨之美非茲篇所論故不論戊寅中秋江東楊圻雲史序於香
江旅次

自序

陳元孝先生與屈翁山梁藥亭齊名世所稱嶺南三大家者也
杭堇浦詩云蒼涼懷古意豈是屈梁能以是人尤推重先生則
以先生處邦國艱虞之會抱覆巢完卵之痛兩度北行力圖匡
復志雖未逮實已集忠臣孝子仁人志士於一身大節觥觥固
不徒以章句鳴也予與先生同里龍山陳氏凡十一戶雖系出
各殊而門閭相錯世敘兄弟邇更合諸族爲聯衛堂每歲以忠
愍公及先生生卒日爲崇先集議之日驩緒其世是先生於予
蓋族祖也予幼隨家君子受書獨漉堂集已熟讀之矣十六歲
父執溫丈毅夫撰先生年譜屬予爲助以是益詳先生言行頗
欲箋釋其詩以廣諸世卒卒未果後此束屨遠游將二十載乙
亥南歸稍得治吾舊業而烽煙遽起外侮紛乘飛車日嗶嗶屋
瓦間於是謝絕塵事獨居閉戶窮昕夕之力以成斯箋稿甫脫

吾鄉已告不守遷徙流離遂又復爲無家之人矣竊思獨漉堂詩世不多見嶺南三家詩選中祇是一鱗一爪未足以知先生且慨夫有明之季士大夫凜節死義湮沒無聞者何可勝數永歷蒙難粵中忠貞體國之烈尤爲亙古罕覩滿清入主中夏紀述者格於時勢乃多略而不詳沈沈於今三百年矣讀書論世予於集中諸詩其有關先生生平大節者悉按當時情事細意尋繹而於酬唱往還諸人事蹟亦不憚煩冗考紀獨多非敢謂發潛德之幽光亦藉以補輶軒之未逮耳嗟夫山河破碎人紀沈淪哀此艱危視先生時爲尤烈曠世相感有使人掩卷低徊而不能自己者厓門海水東去滔滔奈之何哉奈之何哉戊寅初秋陳荆鴻序於香島客齋

又序

戊寅之歲予箋獨漉堂詩稿甫脫而亂作携之香江嘗分日刊報章上其後日軍陷境予復間關歸國詩文圖籍不克挾以俱行寄存同鄉織坊中遂爲飛車所燬戰事告終重抵海隅友人劉君筱雲以其曩所剪存者計凡六帙悉以歸贈高情足感喜不自勝然亡佚尙多蓋祇原稿之半耳憫其爲之也勞不忍棄去今夏逍暑山居乃拾遺補闕重加詮次窗外海濤松風時相和答若慰予之寥寂者不意憂患餘生猶得以其兵燹殘編銷磨歲月此固先生詞賦有靈予亦幸償夙願焉回首茫茫又十餘歲學殖荒落而雙鬢斑矣辛卯六月陳荆鴻書於赤柱山中

本箋付印中時日稽延而

先府君棄世渴欲一覩不可
得抱憾曷極謹書此誌劬勞
之教 辛卯冬十月陳荆鴻

凡例八則

獨漉先生父子爲南明遺臣今在箋釋中特紀永歷年號以從其志

按先生請卹疏書後稱先府君易名之典以徒手之故議之連年粵以再陷而終不定故先生於詩文集中心祇尊其父爲先大司馬而不及諡惟據明史則云桂王賜諡忠愍迨清乾隆四十四年褒揚勝朝殉節諸臣復賜諡忠烈今依明史在箋釋中稱先生父曰忠愍公

集中諸詩除小禺後集外均爲先生手定層次井然第揆厥時日尙有不少後先倒置者未悉是否數經刻印遂滋錯亂今一仍其舊

小禺集原列爲初二三集今循序而下不復分次

先生晚歲卜居廣州鸞詩字自給稍與當世往還故酬唱集中

多有幕府儒生及四方往來賓客事蹟不詳祇有待考

先生對忠愍公增城九頭龍墓地刻意經營屢見集中諸詩年前州中士紳發起重修掘得墳志赫然先生手筆尤爲彰彰可考順德邑城亦有忠愍公遺塚蓋紀忠者近日邑人辯議紛如莫衷一是故箋釋中於先生舟經故里不泊及修先墓作諸詩特詳加徵引以釋羣疑

郡縣志修自清乾隆中葉以前者以時方忌諱對明末遺民事蹟多不敢詳載甚或圖舛誤如李恕仕永歷先生集中諸詩極推崇之而四會縣志竟列爲清初鶴慶府知府諸如此類苟從各家著述中足以證明徵實者概加考正以待信史

斯箋參考書籍除家藏外多獲友朋借助海隅兵後諸感荒闕自愧見聞寡陋謬誤不免大雅君子以時指正之幸甚幸甚



丙子九月二十五日先生生朝約同州中士紳赴祥

雲嶺謁墓敬賦

何處遺廬認大良更無山舍育賢坊分明墓是無窮事留

與人間作耿光

先生修先墓詩云墓是無窮事人兼不朽名

翁山山帶一時捐黯黯離懷正此年寄語九原如可慰不

辭載酒暮雲邊

先生詩云離懷黯黯傷今夕自注時翁山物故考屈翁山吳山帶均沒於丙子

記讀生朝乙丙吟錦巖兩歲見歸心固知一掬西風淚寫

到餘年感倍深

先生集中有乙亥生日歸錦巖次去年韻一首句云淚

灑西風罔極天

爲公遺箸補言詮多覺疏庸不自銓百里驅車齊下拜夕

陽猶是故山川

陳荆鴻